

Pisortat ikiorsiissutaannik pisartagaqarniarluni qinnuteqartup pisartagaqartorluunniit pissutissaqarani:

- suliffissatut innersuunneqartoq akuersaanngippagu,
- suliffissatut innersuunneqartumut takkutinngitsoorpat, imaluunniit
- suliffissatut innersuunneqartumit soraarpat qimaguppalluunniit imaluunniit nammineq pissusilersuutini pissutigalugit soraarsitaappat.

Sapaatip akunnerini sisamani qinnuteqartup imaluunniit imminut napatinniarluni pisortat ikiorsiissutaannik pisartagaqartup aningaasartuutitut aalajangersimasunut kiisalu ataasiarluni aningaasartuutitut ikiorsiissutinik pisartagaqartarunnaarnissaa anguniarlugu Pisortat ikiorsiissutaat pillugit Inatsisartut Peqqussutaannik Naalakkersuisut allanngueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaqaq Andrea Uldum, Demokraatit).

Akissuteqaat

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

Siullermeerneqaranera

Naalakkersuisut Andreas Uldumip siunnersuutaanut qujapput.

Aallaqqaatigalugu oqaatigineqassaaq, Naalakkersuisut isumaqatigimmassuk, pisortat ikiorsiissutaat taamaallaat tunniunneqartassammata, inunnut suliffissatut innersuunneqartumik isumagininnissamat piumassuseqartunut, tassa sulerusunngissuseq, suliffissatut innersuunneqartumut takkutinngitsoorneq ikiorsiissutinik pinissamat tunngaviussanngillat.

Naalakkersuisut anguniagaraat, inuttaasut ataasiakkaat aallaavigalugit aamma ataavartumik suliffeqalernissamik siunertaqartumik sulisinnaasut tamarmik ilitsersorneqartarlutillu siunnersorneqartarnissaat. Kinaluunniit sulileqqinnissamat ikiorserneqarani imminiiginnarneqassanngilaq.

Taamaammat "Siunissarput – illit uangalu akisussaaffipput" pillugu aqqissusseqqinnermut 2025-mut pilersaarut malillugu piviusunngortinniarneqartumut inuttaasut ataasiakkaat sulilernissamat imaluunniit piginnaangorsarnissamat kajumissuseqalersinneqarnissaat Naalakkersuisut ilanngunniarpaat. Tamanna pissaaq ataatsimut isigisumik suliniuteqarnikkut, suliniutit imarissavai suliffiit tamanut inissallit ineriartortinneqarnissaat, inatsisit isumagininnermut, ineqarnermut akileraartarnermullu tunngasut allanngortinneqarnissaat kiisalu suliaqarfimmi ilinniartitaanerup suliniutigineqarnerata tullerriarinnermi salliutinneqarnissaa. Suliaqarfimmi inatsisissatut siunnersuutip saqqummiunneqannnginnerani Naalakkersuisut suliaqarfimmut tunngatillugu pilersaarutitik pillugit nassuiaat 2013-imi saqqummiutissavaat.

Naalakkersuisut isumaqarput, inuk kinaluunniit nukissaminik piginnaasaminillu aallaaveqarluni inuiaqatigiinnut tapersersuissasoq. Pisortat ikiorsiissutaat pillugit Inatsisartut peqqussutaanni takuneqarsinnaavoq, kinaluunniit aallaavittut imminut, nuliaminut/uiminut meeqqaminullu 18-it inorlugit ukiulinnut pilersuinissamat pisussaaffeqartoq. Inuk imminut pilersorsinnaanngikkuni, kiisalu suliffeqarfeqarfinni sulinissamat piumasaqaatinik naammassinnissinnaanngikkuni pilersuinissamat, aningaasartuutitut aalajangersimasunut

ataasiaannartumillu aningaasartuutissanut pisortanit ikiorserneqarnissamik qinnuteqarsinnaavoq.

Pisortat ikiorsiissutaat pillugit Inatsisartut peqqussutaanni § 7 malillugu, kommune taamaallaat pisortat ikiorsiissutaannik tunniussisinnaavoq pilersuinissamut, aningaasartuutitut aalajangersimasunut ataasiaannartumilluunniit aningaasartuutissanut, piunasaqaatit makku arlaat naammassineqarsimappat.

1) qinnuteqaateqartoq suliffeqanngippat aamma suliffissamik naammaginartumik neqeroorfigineqarsimannippat kiisalu suliffigisinnaasaminik nammineq suliniuteqarlularluni ujaasippat.

2) naleqqusarnissamut ajornartorsiuteqarneq peqqiilliornerluunniit, imaluunniit

3) napparsimaneq erninermulluunniit atatillugu sulinngiffeqarneq pissutigalugit sulisinnaanngitsut nalilerneqarpat, taamalu sulisinnaanani.

Piunasaqaatit qulaani pineqartut inatsimmi maanna atuuttumi ilaareerput, tassa inunnt suliffissatut innersuunneqartumik tiguserusunnigitsunut suliffigisinnaasaminillu nammineq suliniuteqarluni atorluaanngitsunut pisortatigoortumik ikiorsiisoqarsinnaanngilaq. Ilutigaluguttaaq inuit piffissap ilaani sulisinnaanngitsut sulisinnaaqqilernissaasa tungaanut, imaluunniit siusinaartumik pensionisiaqalernissaasa tungaanut pisortat ikiorsiissutaannik tunineqarsinnaanerit periarfissaavoq.

Pisortat ikiorsiissutaat ataavartumik pilersorneqarnissamut atorineqartussaannngillat. Inuk pisortat ikiorsiissutaannik qinnuteqartoq imaluunniit pisartagaqareersoq suliffeqarfimmi sulilersinnaanermut pisussaaffeqarpoq. Inuup suliffissaminik naammaginartumik neqeroorfigitittup suliffissaq akuersaassavaa, tassa pineqartoq sulisinnaanngitsutut, napparsimasutut imaluunniit erninermut atatillugu sulinngiffeqartussatut nalilerneqanngippat. Kommune tassaavoq neqeroorutip naammaginaruuneranik naliliisussaq. Inuup qanoq naammassisaqarsinnaatiginera aallaavigalugu naliliisoqassaaq. Inuup kinguneqartinneqanngitsumik suliffik innersuunneqartoq sulinermilluunniit sungiusartinneqarnissaq pillugu innersuussaq tigusersinnaanngilai, soorlu makku tungavilersuutigalugit siusinnerusukkut aningaasarsiarisartakkanut naleqqiullugu aningaasarsiasat ikinneruallaarneri, sulisitsisup isumaqatigiissuteqarsimannginera, imaluunniit suliffissaq pineqartup naammassisinnaasaa siusinnerusukkut suliffigisimasamut imaluunniit ilinniagarisimasamut assigisaannulluunniit sanilliullugu allaappat.

Kommune pisussaaffeqarpoq, inuup pisortat ikiorsiissutaannik qinnuteqartup, piffissaq qaninnerusoq ungasinnerusorlu isigalugit qanoq imminut ilaqtaminullu pilersuisinnaanera pillugu siunnersorneqarnissaanut. Siunnersuineq oqartussaasunut allanut attaveqarnissamut ikiuutaasinnaavoq, assersuutigalugu suliffissarsiuussisarfirmut, atornerluisunut katsarsaarsarfinnut, peqqinnissaqarfimmut imaluunniit inissiatileqatigiiffimmut.

Inuk suliffissatut innersuunneqartumik naammaginartutut isigineqarsinnaasumik tiguserusunnigitsaq, suliffimmi sulisinnaasutut isigineqarunnaassaaq, taamaammallu pilersuinissamut, aningaasartuutitut aalajangersimasunut ataasiaannartumillu aningaasartuutissanut pisortat ikiorsiissutaannik pissarsinissamut pisinnaatitaaffeqarani. Tamanna aamma atuuppoq, pisortat ikiorsiissutaannik pissarsisartoq suliffissatut innersuunneqartumut takkutinnigitsoorpat, suliffissatut innersuunneqartumit qimaguppat imaluunniit nammineq pissusilersuutai pissutaallutik suliffiup atorunnaarsinneqarneranut pisuussuteqarpat.

Naggataatigut oqaatigineqassaaq, inunnt sulisinnaagaluarlutik sulerusunnigitsunut pisortat ikiorsiissutaannik tunniussisoqartassanngitsaq pillugu siunnersuuteqartup oqaatigisaanut Naalakkersuisut isumaqataammata. Naalakkersuisut isumaqarmata, siunnersuuteqarnikkut siunertarineqartoq pisortat ikiorsiissutaat pillugit inatsisartut peqqussutaanni atuuttumi

iluarsineqareersimasoq, aalajangiussassatut siunnersuut itigartinneqassasoq Naalakkersuisut inassutigaat.